

Powšitkowne WOZJEWJENJA

njedźelu, 20. julija 2014

Putnikowanje džěci

Džěci ze wšitkich serbskich wosadow su srjedu, 23. julija, pod hesłom „Wotewr mje, twoje słowo je mi kluč“ na putnikowanje do Róžanta přeprašene. Boža mša budže w 10.30 hodź. w hnadownej cyrkwi. Po mjezyprogramje so putnikowanje z nyšporom w 13.00 hodź. zakónči.

Putnikowanje ministrantow

Serbscy ministranća maja wužohnowansku pobožnosć wšěch putnikow Drježdžansko-Mišnjanskeho biskopstwa do Roma w Mnichowje wuhotować. Proba chóra budže štwórtk, 31. julija, wot 17.00 do 19.00 hodź. na Chróšćanskej farje.

Kemše w Krupce

Na putniku Božu mšu srjedu, 30. julija, w 10 hodź. w Krupce pojedže zaso bus. Štóž chce sobu jěć, njech přizjewi so hač do pjatka, 25. julija, pola Šmitec wozydłownistwa w Radworju, telefonowe čisło (03 59 35) 28 60.

Městno za swobodne socialne lěto

Dom swjateje Ludmile w Chróšćicach ma swobodne městno za swobodne socialne lěto. Štóž nima po šulskim zakónčenju hišće žanu perspektiwu a je mjez 16 a 27 lětami młody, móže čas wužić, so powołansce orientować a něšto cyle praktiske činić. Nadrobne informacije podawaja so pod www.dicvdresden-meissen.caritas.de abo pod telefonowym čislom (03 57 96) 94 73 30.

Putniska jězba do Kevelaera

Za putniku jězbu wot póndzele do soboty, 11. do 16. awgusta, do wuznamneho putniskeho města Kevelaera na zapadneje mjezy Němskeje je hišće něšto městnow swobodnych. Přizjewić móža so zajimcy pola Šmitec wozydłownistwa w Radworju, telefonowe čisło (03 59 35) 28 60. *T. Kubašec*

Jubilejny koncert serbskich komponistow

Koncert k jubilejnym narodninam serbskich komponistow J. P. Nagela (80), D. Kobjele (70), J. Mětška a U. Pogody (wobaj 60) budže tutu njedźelu, 20. julija, we 18.00 hodź. w serbskej cyrkwi w Budyšinje. Zhromadnje ze smyčkowym kwartetom „Chordophone“ a z klawěrnym přewodom Giny Hentsch zaspěwa chór 1. serbskeje kulturneje brigady někotre znate, ale tež njeznate twórby tutech komponistow. Sopranowe solo přewozmje Daniela Hazec, na piščelach zahraje cyrkwinski hudźbny direktor Friedemann Böhme, kotryž ma tež cyłkowny nawod.